



CHINESE - JAPANESE LIBRARY  
HARVARD - YENCHING INSTITUTE  
AT HARVARD UNIVERSITY  
JAN 10 1941









宋史新編卷五十九

列傳一

明南京戶部主事莆田柯維騏

列傳

后妃

記曰天子聽男教后聽女順相須以成治也昔虞以一  
女興周以三母昌桀紂幽王以妹妲褒姒亡治亂之效  
曾何爽哉自王風不復還也禮防頹而彤史廢輔佐君  
子之懿鮮聞而反易朝綱騫汙人紀如漢呂王唐武韋  
楊者何可勝道論者謂趙宋一代家法古今曠見云蓋  
昭憲杜后相宣祖累大勳篤生二胤為開先裕後之令

哈佛大學漢和  
圖書館珍藏印

柯維騏  
明南京戶部主事莆田柯維騏



主史稱嚴毅有禮法家人嗃嗃道固然也子孫世守厥  
訓而曹高向孟皆克嗣徽音歷三百餘年無宮闈戚畹  
之禍足爲後世之楷範矣可弗述乎

昭憲杜太后

孝惠賀皇后

孝明王皇后

孝章宋皇后

淑德尹皇后

懿德符皇后

明德李皇后

元德李皇后

章懷潘皇后

章穆郭皇后

章獻明肅劉皇后

章懿李皇后

章惠楊皇后

沈貴妃附

郭皇后

慈聖光獻曹皇后

張貴妃 苗貴妃

周貴妃 楊德姬 馮賢妃附

宣仁聖烈高皇后

欽聖憲肅向皇后

欽成朱皇后

欽慈陳皇后

林賢妃 武賢妃附

昭慈聖憲孟皇后

昭懷劉皇后

顯恭王皇后

顯肅鄭皇后

顯仁韋皇后

王貴妃 喬貴妃 劉貴妃附

仁懷朱皇后

昭憲杜太后定州安喜人歸宣祖治家嚴毅有禮法生  
太祖兄弟五人在周以太祖貴封南陽郡太夫人太祖



為六師推戴報至曰吾兒素有大志今果然大祖即位  
尊為皇太后謂太祖曰吾聞為君難若治得其道則此  
位可尊苟或失馭求為匹夫不可得太祖再拜曰謹受  
教明年不豫謂太祖曰周世宗使幼兒主天下故汝有  
今日汝百歲後當傳位汝弟能立長君社稷之福也太  
祖泣曰敢不如教命趙普於榻前為誓書普署名紙尾  
識金匱崩年六十諡明憲乾德二年更昭憲凡皇太后  
祈廟去大字語在禮志

不惠賀皇后開封人右千牛衛率府率景思之女  
順動以禮法景思嘗為軍校與宣祖同居護聖營

祖為太祖聘焉顯德中以太祖貴封會稽郡夫人生  
主德昭薨年三十大祖即位追冊為皇后乾德二年諡  
孝惠凡皇后園陵祈廟見禮志

孝明王皇后邠州人彰德軍節度使饒之女太祖為殿  
前都點檢聘為繼室恭勤不懈仁慈御下封瑯邪郡夫  
人太祖即位冊為皇后乾德初崩年二十二諡孝明

孝章宋皇后洛陽人左衛上將軍偓之女母漢永寧公  
主后幼隨母人見周太祖賜冠帔乾德中太祖召見復  
賜冠帔時偓任華州節度后隨母歸鎮已復隨母來賀  
長春節開寶元年納入宮為皇后年十七性柔順好禮



太祖崩號開寶皇后至道元年崩年四十四諡孝章  
淑德尹皇后相州人滁州刺史廷勛之女太宗在周時  
娶焉早薨及卽位追冊爲皇后諡淑德

懿德符皇后宛丘人魏王彥卿之女周顯德中歸太宗  
太宗爲晉王改封越國夫人薨年三十四卽位追冊爲  
皇后諡懿德周太后其姊也淳化四年殂

明德李皇后上黨人刺史處耘之女太平興國三年入  
宮雍熙元年立爲皇后性恭謹莊肅撫育諸子及嬪御  
甚厚真宗卽位尊爲皇太后所居宮曰萬安崩年四十  
五諡明德

元德李皇后真定人乾州防禦使英之女有容德太祖  
爲太宗聘焉生楚王元佐後夢日輪逼已承以裾光耀  
遍體驚而寤生真宗太宗卽位封夫人未幾薨年三十  
四真宗卽位追封賢妃又尊爲皇太后諡元德

章懷潘皇后太名人忠武軍節度美之女真宗在韓邸  
娶焉封莒國夫人早薨年二十二真宗卽位追冊爲皇  
后諡莊懷舊制后諡冠以帝諡慶曆中禮官言孝字連  
太祖諡德字連太宗諡遂改莊爲章以連真宗諡云

章穆郭皇后太原人宣徽南院使守文之女真宗在襄  
邸娶焉累封秦國夫人卽位立爲皇后崩年三十二后



謙約惠下族屬以家事求言於上者后終不許及崩上深嗟悼謚莊穆改章穆

章獻明肅劉皇后華陽人祖延慶晉漢間爲右驍衛大將軍父通虎捷都指揮使嘉州刺史母龐夢月入懷已而有娠生后真宗卽位入爲美人進德妃章穆崩真宗欲立爲后大臣多以爲不可卒立之宸妃生仁宗后以爲已子后性警悟曉書史聞朝廷事能記本末天禧四年真宗久疾居宮中事決於后宰相寇準密議奏請皇太子監國謀泄罷相用丁謂代之既而入內都知周懷政謀廢后殺謂復用準以輔太子謂夜造樞密使曹利用

用謀明日誅懷政貶準語在懷政傳於是詔皇太子開資善堂引大臣決事后裁制於內真宗崩仁宗幼遺詔尊后爲皇太后權處分軍國事大臣議帝與太后五日一御承明殿垂簾聽政太后忽出手書第欲禁中閱章奏遇大事卽召對輔臣其謀出於丁謂非太后意也謂旣貶乃如初議百官表賀有司請制令稱吾生日爲長寧節出入御大安輦鳴鞭侍衛如乘輿群臣上尊號御文德殿受冊其後正至常御殿陳黃麾仗宮架登歌二舞天子率群臣上壽乃受朝明道二年耕籍田謁廟乘玉輅薦獻服袞衣儀天冠語在輿服志復加尊號是歲



崩年六十五謚章獻明肅稱制四謚自后始后稱制十一年號令嚴明恩威加天下丁謂曹利用竝以侮權賤竄左右近習亦少假借宮掖間未嘗妄改作小臣方仲弓上書請依武后故事立劉氏廟而程琳亦獻武后臨朝圖后擲其書于地曰吾不作此負祖宗事有漕臣劉綽者自京西還言在庾有騰糧千餘斛乞付三司后問曰卿識王曾張知白呂夷簡魯宗道乎此四人豈因獻羨餘進哉晚稍進外家任內宮羅崇勳江德明等訪外事崇勳等以此勢傾中外兄子從德死姻戚門人廝役拜官者數十人御史曹修古楊偕郭勸段少連論奏悉

被譴太后保護帝既盡力帝所以奉太后亦甚備帝秋長猶不知爲宸妃所出終太后世無毫髮間隙焉其後言者多追詆稱制時事范仲淹以爲言上曰此朕所不忍聞也下詔戒中外毋輒言

章懿李皇后杭州人入宮爲章獻侍兒莊重寡言真宗以爲司寢既有娠從帝臨砌臺玉釵墜妃惡之帝心卜釵完當爲男子已而生仁宗章獻以爲已子使楊淑妃保視之進婉儀仁宗卽位妃嘿處先朝嬪御中未嘗自異自順容進宸妃薨年四十六初章獻欲以宮人禮治喪於外丞相呂夷簡奏宜從厚乃用一品禮語在夷簡



傳夷簡又謂入內都知羅崇勳妃當以后服殮用水銀  
實棺異時勿謂夷簡未嘗道及崇勳如其言章獻崩燕  
王爲仁宗言陛下乃李宸妃所生妃死非命仁宗下哀  
痛之詔自責尊宸妃爲皇太后諡莊懿幸洪福寺祭告  
易梓宮親哭視之妃玉色如生冠服如皇太后仁宗嘆  
曰人言其可信哉遇劉氏加厚慶曆中改諡章懿初章  
獻臨朝訪求妃親屬得其弟用和補三班奉職及是拜  
用和彰信軍節度使檢校侍中以子瑋尚主

章惠楊皇后益州人年十二侍真宗于東宮真宗卽位  
進婉儀凡巡幸皆從章獻爲修儀妃與之位幾埒而妃

通敏有智思奉順章獻無所忤後加淑妃真宗崩遺制  
以爲皇太妃始仁宗在乳褓章獻使妃護視恩意勤備  
及卽位章獻遺詔尊爲皇太后所居宮曰保慶稱保慶  
皇太后薨年五十三帝思其保護恩特優典禮諡莊惠  
後改莊爲章詳見禮志初仁宗未有嗣后每勸帝擇宗  
子近屬而賢者養宮中其選卽英宗也

沈貴妃以將相家子被選爲人淑儉不華長秋虛位真  
宗欲立之不果進貴妃熙寧初卒年八十三諡昭靜

郭皇后金城人節度使崇之孫天聖初仁宗欲立張美  
人阻於章獻后立頗見踈後尚美人楊美人俱幸數與



后忿爭后批尚氏頰帝自起救之誤批上頸入內都知  
閻文應勸帝以爪痕示執政謀廢后夷簡以前罷相怨  
后乃曰古亦有之后遂廢封淨妃玉京沖妙仙師賜名  
清悟居長樂宮孔道輔等十人伏閣言后無過不可廢  
道輔等俱黜景祐元年出居瑤華宮而尚楊二美人俱  
廢語在文應傳中帝又賜后號後頗念之遣使存問賜  
以樂府后和答辭甚愴惋帝嘗密令召入后曰須百官  
立班受冊方可屬小疾遣文應挾醫診視數日暴薨中  
外疑文應進毒上深悼之追復皇后禮官張洞請祔廟  
知制誥劉敞力辨其不可事竟寢

慈聖光獻曹皇后真定人武惠王彬之孫郭后廢聘入  
宮景祐元年冊爲皇后性慈儉常於禁苑種穀親蠶善  
飛白書慶曆八年閏正月帝將以望夕再張燈后諫止  
後三日衛卒數人作亂夜越屋叩寢殿后方侍帝聞變  
遽起帝欲出后閉閣擁持趣呼都知王守忠使引兵入  
賊傷宮嬪殿下聲徹帝所宦者以乳媪毆小女子給奏  
后叱之曰賊在近殺人敢妄言邪后度賊必縱火陰遣  
人挈水踵其後果舉炬焚簾水隨滅之是夕所遣宦侍  
后皆親剪其髮諭之曰明日行賞用是爲驗故爭盡死  
力賊卽禽滅英宗方四歲選入禁中后拊鞠加慎迨爲



皇子贊策居多帝夜暴崩后悉斂諸門鑰寘於前召皇子入及明宰臣韓琦等至奉英宗卽位尊后爲皇太后名宮曰慈壽帝感疾請權同處分軍國事御內東門小殿聽政大臣奏事有疑者則曰公輩更議之未嘗出已意曹氏及左右臣僕毫分不假借宮省肅然明年帝疾益愈卽命撤簾還政帝敕有司崇峻典禮以弟侂同中書門下平章事神宗立尊爲太皇太后帝致極誠孝無所不盡后亦慈愛天至崩年六十四帝推恩曹氏拜侂中書令進官者四十餘人初王安石當國創行新法后兼間語帝曰吾聞民間甚苦青苗助役宜罷之安石

有才學顧怨之者甚衆不如欲愛惜保全不若暫出之於外帝悚聽然新法竟爲安石所持不果罷帝嘗有意於燕薊已與大臣定議乃詣后白其事后曰儲蓄賜予備乎鎧仗士卒精乎事體至大吉凶悔吝生乎動得之不過南面受賀而已萬一不諧則生靈所係未易以言苟可取之太祖太宗收復久矣何待今日帝曰敢不受教蘇軾以詩得罪下御史獄人以為必死后違豫中聞之謂帝曰嘗憶仁宗以制科得軾兄弟喜曰吾爲子孫得兩宰相今聞繫獄得非仇人中傷乎拮至於詩其過微矣吾疾勢已篤不可以寬濫致傷中和宜熟察之帝涕



泣軾由此得免及崩帝哀慕毀瘠諡慈聖光獻  
張貴妃祖穎父堯封俱舉進士堯封卒世父堯佐不收  
恤妃幼無依納章獻宮侍仁宗有盛寵妃巧慧善承迎  
勢動中外進貴妃卒年三十一追冊皇后諡溫成立廟  
事見楊畋傳中又有苗貴妃者開封人入宮生唐王昕  
英宗育禁中妃擁佑頗有恩既踐阼進貴妃卒年六十  
九諡昭節又有周貴妃亦開封人帝崩妃日一蔬食屢  
處一室誦佛書困則假寐覺則復誦晝夜不解衣者四  
十年連進至賢妃徽宗立加貴妃年九十三卒諡昭淑  
又有楊德妃定陶人初爲美人端麗機敏妙音律組

書藝一過目如素習積與郭后不相能后既廢妃亦進  
出後復召爲婕妤至修儀熙寧中卒年五十四贈德妃  
又有馮賢妃東平人初封平郡君養女林美人得幸神  
宗生二王而沒王尚幼妃保育之累加脩容始終五朝  
動循禮度卒年七十七贈賢妃

宣仁聖烈高皇后蒙城人曾祖瓊祖繼勳皆有勳勞別  
有傳英宗成昏濮邸生神宗及二王封京兆郡君卽位  
立爲皇后神宗立尊爲皇太后居寶慈宮帝累欲爲高  
氏營大第不許久之但斥賜望春門外隙地凡營繕費  
悉出寶慈不調大農一錢哲宗立尊爲太皇太后以生



日爲坤成節名宮曰崇慶后臨朝驛召司馬光呂公著  
未至迎問初政所宜二人未及條上已散遣修京城役  
夫減皇城覘卒止禁庭工技廢導洛司出近侍尤無狀  
者戒中外毋苛斂寬民間保戶馬事由中旨王珪等弗  
預知又起文彥博於旣老遣使勞諸途諭以復祖宗法  
度爲先務且令亟疏可用者從父遵裕坐西征失律抵  
罪蔡確欲獻訣以固位乞復其官后曰遵裕靈武之役  
塗炭百萬先帝中夜得報起環榻行徹且不能寐聖情  
自是驚悸馴致大故禍由遵裕得免刑誅幸矣先帝肉  
未令吾何敢顧私恩而違天下公議確悚慄而止光公

著至竝命爲相使同心輔政一時知名士彙進於廷凡  
熙寧以來政事弗便者次第罷之以常平舊式改青苗  
以嘉祐差役參募役除市易之法追茶鹽之禁舉邊砦  
不毛之地以賜西戎而宇內復安遼主戒臣下勿復生  
事疆場曰南朝盡行仁宗之政矣蔡確坐車蓋亭詩謫  
嶺表后謂大臣曰以子繼父有何間言而確自謂有定  
策大功妄扇事端規爲異時眩惑地吾不忍明言姑託  
訕上爲名逐之耳此宗社大計姦邪怨謗所不暇恤也  
有司請受冊寶於文德后曰母后當陽非國家美事况  
天子正衙豈所當御就崇政足矣臨政九年朝廷清明



華夏綏定力行故事抑絕外家私恩文思院奉上之物  
無問巨細終身不取其一人以爲女中堯舜元祐八年  
九月崩年六十二謚宣仁聖烈後二年章惇蔡卞邢恕  
造爲不根之謗皇太后太妃力辨其誣事乃已語在恕  
傳高宗時詔暴惇等罪褒錄后家

欽聖憲肅向皇后河內人宰相敏中曾孫也神宗在穎  
邸聘爲夫人卽位立爲皇后哲宗立尊爲皇太后宣仁  
命葺慶壽故宮以居后后曰姑居西而婦處東是瀆分  
也因固辭遂以慶壽後殿爲隆祐宮居之帝將卜后及  
諸王納婦后敕向族勿寘選中族黨有欲援恩換閣職

及爲選人求京秩者一不與帝倉卒晏駕獨決策迎端  
王徽宗立請權同處分軍國事后以長君辭帝泣拜移  
時乃聽凡章惇所斥逐賢大夫士稍稍收用之纔六月  
卽還政崩年五十六謚欽聖憲肅帝追念不已乃數加  
恩兩舅宗良宗回皆封郡王而自敏中以上三世亦追  
列王爵非常典也

欽成朱皇后開封人熙寧初入宮生哲宗累進德妃哲  
宗立尊爲皇太妃時宣仁欽聖二太后皆居尊故稱號  
未極元祐三年宣仁詔春秋之義母以子貴於是輿蓋  
仗衛冠服悉侔皇后紹聖中欽聖復命卽閣建殿改乘



車爲輿出入由宣德東門百官上殿稱殿下名所居爲  
聖瑞宮崇寧初薨年五十一追冊爲皇后諡欽成

欽慈陳皇后開封人初爲御侍生徽宗進美人神宗崩  
守陵殿毀瘠骨立左右進粥藥揮使去曰得早侍先帝  
足矣未幾薨年三十二徽宗追冊爲皇太后諡欽慈

林賢妃南劍人生燕王俛越王偲進婕妤元祐中卒用  
一品禮葬贈賢妃又有武賢妃生吳王佖歷美人婕妤  
徽宗卽位進昭儀賢妃卒諡惠穆

昭慈聖獻孟皇后洛州人馬軍都虞候贈太尉元之孫  
女也哲宗旣長歷選世家女百餘入宮后年十六宣仁

及欽聖皆愛之元祐七年宣仁諭宰執孟氏子能執婦  
禮宜正位中宮又以近世禮儀簡略詔議冊后六禮以  
進命呂大防充奉迎使韓忠彥副之蘇頌充發策使王  
巖叟副之蘇轍充告期使皇叔祖宗景副之皇伯祖宗  
晟充納成使范百祿副之王存充納吉使劉奉世副之  
梁燾充納采問名使鄭雍副之帝親御文德殿冊爲皇  
后父之劉婕妤有寵紹聖三年后朝景靈宮訖事就坐  
諸嬪御立侍劉獨背立簾下后閣中陳迎兒呵之不顧  
閣中皆忿冬至日會朝欽聖太后於隆祐宮后御坐朱  
絲金飾婕妤在他坐有慍色從者爲易坐製與后等衆



弗能平因傳唱曰皇太后出后起立劉亦起尋各復其所或已撤婕妤坐遂仆于地懟不復朝泣訴于帝內侍郝隨謂婕妤曰母以此戚戚願爲大家早生子此坐正當爲婕妤好也會后女福慶公主疾后有姊頗知醫嘗已后危疾以故出入禁掖公主藥弗效特道家治病符水入治后驚曰姊寧知宮中禁嚴與外間異邪令左右藏之俟帝至具言其故帝曰此人之常情耳后即藝符於帝前宮禁相傳厭魅之端作矣未幾后養母燕氏尼法端與供奉官王堅爲后禱祠事聞詔即皇城司訊之捕逮宦者宮妾幾二十人榜掠備至肢體毀折至有斷

舌者獄成命侍御史董敦逸覆錄罪人過庭下氣息僅屬無一人能出聲者敦逸秉筆疑未下郝隨等以言脅之敦逸畏禍及已乃以奏牘上詔廢后出居瑤華宮號華陽教主玉清妙靜仙師法名冲真初章惇誣宣仁有廢立計以后逮事宜仁欲傾之又陰附劉欲請建爲后遂與郝隨構成是獄天下冤之帝久亦悔焉元符末欽聖太后將復后位適有布衣上書以后爲言者即命以官於是詔后還內號元祐皇后時劉號元符皇后故也崇寧初郝隨諷蔡京再廢后昌州判官馮澥上書言后不得復臺臣錢適石豫左膚等連章論韓忠彥等信一



布衣狂言復已廢之后以掠虛美蔡京與執政許將溫  
益趙挺之張商英皆主其說徽宗從之詔依紹聖詔旨  
復居瑤華宮加賜希微元通知和妙靜仙師靖康初瑤  
華宮火徙居延寧宮又火出居相國寺前之私第金人  
圍汴欽宗與近臣議再復后尊爲元祐太后詔未下而  
京城陷時六宮有位號者皆北遷后以廢獨存張邦昌  
僭位上尊號元祐皇后迎入禁中垂簾聽政后聞康王  
在濟遣左右丞馮澥李回及兄子忠厚持書奉迎尋降  
手書播告天下王至南京后遣奉主寶乘輿服御迎王  
卽皇帝位改元后以是日撤簾尊后爲元祐太后尚書

省言元字犯后祖名請易以所居宮名遂稱隆祐太后  
會張浚請先定六宮所居地遂詔忠厚奉太后幸杭州  
以苗傅爲扈從統制踰年傅與劉正彥作亂請太后聽  
政又請立皇子太后諭之曰強敵在外我以婦人抱三  
歲小兒聽政將何以令天下傅等泣請太后力拒之帝  
聞事急詔禪位元子太后垂簾聽政韓世忠妻梁氏在  
傅軍中勝非以計脫之太后召見勉令世忠速來以清  
嚴陞梁氏馳入世忠軍諭太后意世忠等遂引兵至太  
后喜曰吾責塞矣再以手札趣帝還宮遂撤簾帝上皇  
太后尊號既而帝幸建康命鄭榘衛太后繼發會防秋



宋史新編卷五十九  
追命劉寧止制置江浙衛太后往洪州命滕康劉珪權  
知三省樞密院事從行復命都指揮使楊惟忠將兵萬  
人衛從過落星寺舟覆宮人溺死者十數惟太后舟無  
虞既至洪州金人遂自大冶縣徑趣洪州康珪奉太后  
行次吉州金人追急太后乘舟夜行質明至太和縣舟  
人景信反楊惟忠兵潰失宮人一百六十康珪俱遁兵  
衛不滿百遂往虔州太后及潘妃以農夫肩輿而行帝  
慮太后徑入閩廣遣使歷詢后所在及知在虔州遂命  
中書舍人李正民來朝謁遣御營司都統辛企宗等迎  
歸太后至越帝親迎于行宮門外入宮禁中嘗微苦風

眩有宮人自言善符呪疾良已太后驚曰吾豈敢復聞  
此語耶立命出之太后生辰置酒宮中從容謂帝曰宣  
仁太后之賢古今母后未有其比昔奸臣肆為謗誣雖  
嘗下詔明辨而國史尚未刪定豈足傳信帝迺更脩實  
錄而奸臣情狀益著帝事太后極孝雖帷帳皆親視或  
得時果必先獻然後敢嘗宣教郎范燾與忠厚有憾誣  
與太后密養欽宗子帝曰朕於太后如母子安得有此  
卽治其罪崩年五十九上尊號昭慈獻烈推恩外家五  
十餘人祔廟在昭懷皇后上後改諡昭慈聖獻后性節  
儉謙謹有司月供千緡而止以恩澤當得官者近八十



東坡雜錄卷五十九  
員后未嘗陳請初后受冊日宣仁太后歎曰斯人賢淑  
惜福薄耳異日國有事變必此人當之後皆如所云  
昭懷劉皇后初爲御侍明豔多才藝有盛寵進賢妃生  
獻愍太子孟后位中宮后不循列妾禮且陰造奇語以  
售謗孟后既廢后竟代焉鄒浩極諫坐竄徽宗立冊爲  
元符皇后明年尊爲太子宫名崇恩后頗干預外事且  
以不謹聞爲左右所逼簾鉤自縊年三十五謚昭懷  
顯恭王皇后開封人刺史藻之女也徽宗成昏端邸封  
順國夫人卽位立爲皇后生欽宗后性恭儉崩年二十  
五謚靜和紹興中改顯恭

顯肅鄭皇后開封人本欽聖殿押班徽宗卽位遂以  
之遷貴妃有異寵徽宗多資以詞章天下歌之王皇后  
崩立爲皇后性端謹善順承帝意恩澤皆弗陳請時族  
子居在中樞府后奏外戚不當預國政必欲用之且令  
充妃職帝爲罷居中居中復用后歸寧還言居中與父  
紳相往還人皆言其招權市賄乞禁絕許御史奏劾欽  
宗立尊爲太上皇后居寧德宮汴京破北遷留五年崩  
于五國城年五十二謚顯肅初后至金營自言家屬不  
預朝政乞留勿遣粘罕許之故紳得歸紳時爲太師  
顯仁韋皇后開封人高宗母也入宮累遷婉容進封龍



德宮賢妃從徽宗北遷建炎改元遙尊爲宣和皇后後翰林學士朱震引唐建中故事請尊爲皇太后從之已而太常少卿吳表臣請依嘉祐治平故事俟三年喪畢然後舉行乃先降御札播告天下后三代俱追封王爵帝以太后久未歸每輦蹙曰金人若從朕請餘皆非所問也金人來議和帝曰朕有天下而養不及親徽宗無及矣今立誓信當明言歸我太后朕不恥和不然朕不憚用兵命何鑄曹勛報謝召至內殿諭之曰朕北望庭闈無淚可揮卿見金主當曰慈親之在上國一老人耳在本國則所繫甚重以至誠說之庶彼有感動鑄等至

金國再三懇請始允遣其臣高居安完顏宗賢等以行帝親至臨平奉迎帝初見太后喜極而泣既至入居慈寧宮紹興十二年八月也先是梓宮未還詔中外輟樂至是慶太后壽節始用樂謁家廟親屬遷官二十人太后聰明有智慮稱貸于金使得黃金三千兩以犒其衆由是途中無間言嘗謂帝兩宮給使宜令通用不然則有彼我之分而佞人間言易以入也十九年太后年七十正月朔卽宮中行慶禮八十亦如之未幾崩謚顯仁太后性節儉有司進金唾壺太后易令用塗金所得供進財帛多積於庫後喪葬之費皆仰給焉



王貴妃初與顯肅鄭皇后俱為押班徽宗立進至貴妃  
生鄆王楷莘王植陳王機卒諡懿肅又有喬貴妃初與  
高宗母韋妃俱侍顯肅鄭皇后結為姊妹約先貴者毋  
相忘既而貴妃得幸徽宗遂引韋氏二人愈相得靖康  
同北遷紹興中韋得歸將行喬以金五十兩贈金使高  
居安曰願好護送姊還江南復舉酒酌韋曰姊善重保  
護歸即為皇太后妹無還期終死於朔漠矣遂大慟以  
別又有劉貴妃入宮即大幸由才人七遷至貴妃生濟  
陽郡王棫祁王模信王榛政和三年卒加四字諡曰明  
懿文敘其平生絃諸樂府又踵溫成故事冊贈為后

而以明達諡焉又有安妃劉氏者有寵為才人進至淑  
妃生建安郡王榘嘉國公椅英國公榘加貴妃朝夕得  
侍上擅愛顯席宣和三年卒年二十四初諡明節和文  
旋用明達近比冊贈為皇后帝悼之甚後宮皆往唁帝  
相與啜泣崔妃獨左視無戚容帝疑其厭蠱遂廢崔妃  
為庶人崔生漢王椿及帝姬五人云  
仁懷朱皇后開封人父伯材武康軍節度使欽宗為太  
子備禮冊為妃生子諶即位立為皇后既北遷不知崩  
聞慶元四年上尊號諡仁懷



宋史新編卷五十九

宋史新編卷六十

列傳二

明南京戶部主事莆田柯維騏編

后妃

憲節邢皇后

憲聖慈烈吳皇后

潘賢妃 張婉儀

劉婉容 劉婉儀等附

成穆郭皇后

成恭夏皇后

成肅謝皇后

蔡貴妃 李賢妃附

慈懿李皇后

黃貴妃附

恭淑韓皇后

恭聖仁烈楊皇后

謝皇后

賈貴妃附



全皇后

楊太后

憲節邢皇后開封人高宗居康邸聘之封嘉國夫人王  
出使夫人留居蕃衍宅金人犯京師從三宮北遷上皇  
遣曹勛歸夫人脫所御金環使內侍持付勛曰幸爲吾  
白大王願如此環得早相見也及卽位遙冊爲皇后紹  
興九年后崩于五國城年三十四金人祕之高宗虛中  
宮以待者十六年顯仁太后回鑾始得崩聞并以梓宮  
還初謚懿節淳熙末改憲節

憲聖慈烈吳皇后開封人高宗爲康王后年十四選入  
宮及卽位后常以戎服侍左右從幸四明衛士謀爲變

入問帝所在后給之以免后益博習書史又善翰墨由  
是寵幸與張氏竝爲婉儀尋進貴妃邢皇后崩聞至立  
爲皇后顯仁太后性嚴肅后身承起居順適其意嘗繪  
古列女圖置座右又取詩序之義扁其堂曰賢志初伯  
琮以宗子召入宮命張氏育之后時爲才人亦請得育  
一子於是得伯玖更名璩張卒併育于后后視之無間  
伯琮性恭儉喜讀書帝與后皆愛之帝意決立爲皇子  
封建王出璩居紹興高宗內禪詔后稱太上皇后孝宗  
卽位上尊號曰壽聖太上皇后累加壽聖齊明廣慈備  
德上皇崩稱皇太后移御慈福宮光宗卽位更號壽聖



皇太后紹熙四年壽八十加尊號曰壽聖隆慈備福明年正月帝率羣臣行慶壽禮孝宗崩始正太皇太后之號時光宗疾不能執喪宰臣請垂簾主喪事后不可已而宰執請成服禁中許之后代行祭奠禮尋用樞密趙汝愚請於梓宮前垂簾宣光宗手詔立皇子嘉王爲皇帝翌日立夫人韓氏爲皇后撤簾慶元元年尊號加光祐崩年八十三謚憲聖慈烈

潘賢妃開封人高宗納於康邸生元懿太子高宗卽位欲立爲后不果立爲賢妃卒又有張婉儀劉婉容劉婉張夫人及美人馮氏才人韓氏吳氏李氏王氏俱被

寵幸而劉婉儀尤恃恩招權金人將叛盟劉錡主戰幸醫王繼先從中沮之因謀誅錡高宗不懌婉儀陰訪得其言以寬譬帝意帝恠與繼先言合詰之婉儀急具以實對帝大怒託以他過廢之馮氏以下後皆廢獨吳氏中宮近屬紹興末復故封

成穆郭皇后開封人奉直大夫直卿之女孝宗爲普安郡王娶焉封咸寧郡夫人生莊文太子魏惠憲王及光宗薨年三十一贈福國夫人旣建太子追封皇太子妃受禪追冊爲皇后謚恭懷後改安穆又改成穆孝宗待郭氏恩禮彌厚然不假外戚以官爵



成恭夏皇后宜春人初入宮爲憲聖太后閣中侍御普  
安郡王夫人郭氏薨太后以夏氏賜王卽位進賢妃踰  
年奉上皇命立爲皇后崩諡安恭寧宗時改成恭  
成肅謝皇后丹陽人初入宮憲聖以賜普安郡王卽位  
進貴妃夏皇后崩中宮虛位久之妃侍帝過德壽宮上  
皇諭以立后意尋傳旨立爲后光宗立上尊號壽成皇  
后孝宗崩尊爲皇太后寧宗立加號惠慈光宗崩加號  
壽成惠聖慈祐太皇太后宮曰壽慈崩諡成肅后性儉  
慈減膳羊每食必先進御服澣濯衣有數年不易者  
蔡貴妃自紅霞帔累拜貴妃卒李賢妃累進婕妤好率贈

賢妃孝宗雖在位久後宮寵幸無著聞者

慈懿李皇后安陽人節度使道之女高宗聘爲恭王妃  
進定國夫人乾道四年生嘉王七年立恭王爲皇太子  
及卽位冊爲皇后光宗欲誅宦者近習皆懼遂謀離間  
三宮會帝得心疾孝宗購得良藥欲因帝至宮授之宦  
者遂訴於后曰萬一有不虞其奈宗社何后覘藥實有  
心銜之頃之內宴后請立嘉王爲太子孝宗不許后曰  
妾六禮所聘嘉王妾親生也何爲不可孝宗大怒后退  
持嘉王泣訴于帝謂壽皇有廢立意帝惑之遂不朝太  
上帝嘗宮中浣手睹宮人手白悅之他日后遣人送食



合于帝啓之則宮人兩手也又黃貴妃有寵因帝親郊宿齊宮后殺之以暴卒聞是夕風雨大作黃壇燭盡滅不能成禮帝疾由是增劇不視朝政事多決於后矣是時帝久不朝太上中外疑駭紹熙四年九月重明節宰執侍從臺諫連章請帝過宮是日百官班列俟帝出至御屏后挽留帝入曰天寒官家且飲酒百僚侍衛相顧莫敢言中書舍人陳傅良引帝裾請母入因至屏後后叱曰此何地爾秀才欲斫頭邪其後孝宗崩帝不能親執喪宰相趙汝愚謀內禪立寧宗尊后曰太上皇后上尊號曰壽仁崩年五十六謚慈懿

黃貴妃淳熙末在德壽宮封和義郡夫人光宗爲皇太子傍無姬侍上皇以夫人賜之遂專寵卽位拜貴妃爲李后所殺又有張貴妃亦舊侍東宮次婕妤符氏後出嫁民間

恭淑韓皇后相州人忠獻王琦六世孫也寧宗在平陽郡邸娶焉封新安郡夫人旣受禪立爲皇后崩謚恭淑

恭聖仁烈楊皇后少入宮忘其姓氏或云會稽人有楊次山者亦會稽人后自謂其兄也遂姓楊氏慶元中累封貴妃恭淑皇后崩后與曹美人俱有寵韓侂胄勸寧



宗立曹而后頗涉書史知古今性復機警竟立之后深  
銜侂胄欲寘之死會侂胄用兵中原后俾皇子曦入奏  
侂胄再啓兵端將不利於社稷帝不答后從傍贊甚力  
亦不答后恐事泄命次山擇廷臣可任者共圖之禮部  
侍郎史彌遠素與侂胄有隙欣然奉命參知政事錢象  
祖嘗以諫用兵貶彌遠乃先告之衛涇王居安張鉉皆  
預其謀開禧三年十一月三日侂胄方早朝彌遠密遣  
中軍統制夏震伏兵六部橋側率健卒擁侂胄至玉津  
園槌殺之越三日帝猶不知蓋是謀悉出中宮及次山  
等耳后旣誅侂胄彌遠日益貴用事嘉定十四年帝養

宗室子貴和立爲皇子賜名竑彌遠爲相旣信任於后  
遂專國政竑漸不能平竑書於几曰彌遠當決配八千  
里彌遠大懼陰蓄異志事詳竑傳帝大漸彌遠夜召宗  
室昀入宮后尚未知也彌遠遣后兄子谷及石白廢立  
事后不可凡七往反終不聽谷等泣曰衆已歸心苟不  
立之則變必生楊氏無噍類矣后默然良久曰其人安  
在彌遠等召昀入后拊其背曰汝今爲吾子矣遂矯詔  
廢竑爲濟王立昀爲皇子卽帝位是爲理宗迺尊后曰  
皇太后同聽政以生日爲壽慶節所居殿曰慈明後加  
尊號壽明又加慈睿七十之壽理宗率百官朝慈明加



尊號曰壽明仁福慈睿明年崩諡恭聖仁烈

謝皇后諱道清天台人故宰相深甫之孫女也父渠伯  
早卒家益落后嘗躬親汲飪理宗卽位楊太后私德深  
甫接立功命選謝氏諸女謝氏獨后在室后生而顰黑  
醫一日及是病疹良已膚蛻瑩白醫又藥去目醫遂以  
寶慶三年入宮封通義郡夫人紹定二年進美人三年  
九月進貴妃十二月立爲皇后時同選賈貴妃有殊色  
理宗意欲立賈而沮於太后后旣立賈貴妃專寵賈卒  
閹貴妃又以色進后處之裕如開慶初元兵渡江帝議  
遷都平江慶元后諫恐搖動民心乃止度宗立尊爲皇

太后號壽和聖福以生日爲壽崇節恭帝立尊爲太皇  
太后大臣屢請垂簾同聽政彊之乃許后以兵興費繁  
痛自裁節汰慈元殿提舉已下官省汎索錢月萬緡賈  
似道兵潰陳宜中請正其罪太后曰豈宜以一日罪失  
遇大臣禮先削官乃寘法京朝官聞難往往遁去太后  
命揭榜朝堂禁之語在本紀德祐元年六月朔日食旣  
太后削聖福以應天變丞相王爚陳宜中留夢炎不協  
而張世傑兵敗於焦山宜中棄官去太后累召宜中遺  
書其母使勉之又親爲書召夏貴等兵曰吾母子不足  
念獨不報先帝德乎元兵破常州太后遣陸秀夫等請



和不從宜中卽率公卿請遷都太后不許宜中痛哭固請竟不果明年更命宜中使元軍約用臣禮曰苟存社稷臣非所較也元軍薄阜亭山宜中宵遁百官亦潛相引去臨安陷恭帝與全后北遷太后以疾留杭後亦北遷降封壽春郡夫人端宗立遙上尊號曰壽和聖福至仁太皇太后越七年崩年七十四后家訓素嚴每戒飭子弟有犯則引過毀服脫簪珥待罪尤常情所難云賈貴妃涉之女紹定四年七月入侍後宮封文安郡夫人有寵八月進封才人五年十二月朔進封貴妃幾欲廢謝后以妃代之后無幾微見於顏色乃止其異母弟

似道緣是進用詔以集芳園賜之帝一女適駙馬楊鎮妃出也帝甚鍾愛宰臣初欲倣唐故事取進士第一人尚之時周震炎貌不揚乃止妃用封及身後恤典皆踰常制焉

全皇后會稽人理宗母慈憲夫人姪孫女也理宗以母故詔入宮問曰爾父昭孫昔沒王事令人可哀對曰妾父可念淮湖之民尤可念也帝深異之語大臣曰全氏女言辭甚令宜配冢嫡以承祭祀遂封永嘉郡夫人踰月册爲太子妃度宗卽位立爲皇后生恭帝恭帝立册爲皇太后臨安陷從帝入燕端宗立遙上尊號曰仁安



皇太后後為尼正智寺而崩后之至燕也內宮皆從越  
數日安定夫人陳氏安康夫人朱氏同二小姬沐浴整  
衣焚香自縊死朱夫人遺詩衣中云既不辱國幸免辱  
身世食宋祿羞為北臣妾輩之死守於一貞忠臣孝子  
期以自新元主忽必烈命斷其首懸全后寓所  
楊太后度宗選入宮為美人咸淳二年進封淑妃生端  
宗端宗立冊為太后未幾弟昺嗣立乃修容俞氏所生  
也厓山兵敗昺投海國亡后大慟隨赴海崩后一女封  
晉國公主亦溺焉張世傑葬於海濱語在本紀

宋史新編卷六十

宋史新編卷六十一

列傳三

明南京戶部主事莆田柯維騏編

宗室

昔周大封同姓為藩輔而享國最久漢以來懲秦孤立  
之弊稍倣古王戚屬顧於治無益而亂或為階大抵空  
名而失實已何則漢七國晉八王梁諸鎮率藉權力為  
不軌蓋失之濫魏文防若囹圄宋齊制其死命唐禁錮  
於一宮悉為賊臣所魚肉蓋失之猜趙宋立法固與歷  
代殊第務在保全匪圖倚助遂使靖康舉宗辱於女真  
南渡播遷竟滅於蒙古五峰胡氏謂禦戎上策在封建



非知言耶雖然宋公族號多賢往往為權臣擠陷如令  
衿七儂汝愚其尤也人主舉錯若此欲復封建難哉茲  
詳定宗室列傳用垂永鑒繫以姓者蓋宣和詔云

魏王廷美 燕王德昭  
榮王希秦王德芳 秀王子

漢王元佐 太子元僖 商王元份

越王元傑 鎮王元偓 楚王元偁

周王元儼 太子祐 濮王允讓

太祖兄弟五人兄光濟早亡弟光義即太宗次廷美次  
光贊幼亡太祖受禪追封光濟邕王改曹王光贊夔王

改岐王

魏王廷美字文化本名光美太祖受禪累進檢校太僕  
侍中京兆尹永興軍節度使太宗立改名廷美加中書  
令開封尹封齊王又加檢校太師從征太原封秦王七  
年三月或告秦王廷美驕恣將有陰謀竊發上不忍暴  
其事遂罷開封尹授西京留守厚賚白金錢幣衣帶及  
甲第一區詔樞密使曹彬餞於瓊林苑擢太常博士王  
通等賞其告陰謀功也黜左衛將軍樞密承旨陳從龍  
馬步軍都指揮使王榮等坐交通廷美受燕犒也或又  
告榮嘗與廷美親吏狂言我不久當得節帥坐削籍流  
海島會趙普再相廉得盧多遜在中書與廷美交通事



上聞上怒下多遜御史獄捕繫中書守堂官趙白秦府  
孔目官閻密小吏王繼勳樊德明趙懷祿閻懷忠等命  
翰林學士承旨李昉等雜治之多遜自言累遣趙白以  
機事密告廷美又令白言於廷美云願宮車晏駕盡力  
事大王廷美遣樊德明報云承旨言正會我意私遺多  
遜弓箭等多遜受之閻密初給事廷美上卽位補殿直  
仍隸秦王府恣橫不法言多指斥王繼勳尤爲廷美親  
信嘗使求訪聲妓怙勢取貨贓污狼籍樊德明素與趙  
白遊處多遜因之以結廷美廷美又遣趙懷祿私召同  
母弟軍器庫副使趙廷俊與詰閻懷忠嘗爲廷美詣淮

沂王錢俶求玉帶寶器懷忠受俶私遺金幣廷美又嘗  
遣懷忠齎銀盃錦綵羊酒詣其妻父御前忠佐馬軍都  
軍頭開封潘潁營燕軍校至是皆伏罪詔削奪多遜官  
爵并家屬流崖州廷美勒歸私第趙白閻密王繼勳樊  
德明趙懷祿閻懷忠皆斬於都門外籍其家趙普復教  
知開封府李符上言廷美怨望乞徙遠郡以防他變詔  
降廷美爲涪陵縣公房州安置妻楚國夫人張氏削國  
封雍熙元年廷美至房州憂悸成疾卒年三十八上嗚  
咽流涕謂宰相曰廷美自少剛愎長益凶惡朕以同氣  
至親不忍寘法俾居房陵冀其思過方欲推恩遽茲殞



逝詔追封爲涪王諡曰悼爲發哀成服其後上謂宰相  
曰邇者鑿西池水心殿成橋梁未備朕將泛舟往焉廷  
美與左右謀以此時竊發不果卽詐稱疾於邸俟朕臨  
省因而爲變若命有司窮究則廷美罪不容誅朕不欲  
暴揚其醜及盧多遜交通事發止令居守西洛而廷美  
怨望始命遷房陵以全宥之朕於廷美蓋無省矣初昭  
憲太后不豫命太祖傳位太宗本意蓋欲太宗傳之廷  
美而廷美復傳之德昭德昭不得其死德芳相繼天絕  
廷美始不自安已而柴禹錫等告廷美陰謀上召問普  
因言顧命及自歎之事事詳盧多遜傳上於宮中訪得

普前所上章并發金匱得誓書遂大感悟召普謂曰人  
誰無過朕不待五十已盡知四十九年非矣他日太宗  
嘗以傳國之意訪趙普普曰太祖已誤陛下豈容再誤  
邪凡廷美所以遂得罪普之爲也真宗卽位追復官爵  
仁宗卽位贈太師尚書令徽宗卽位改封魏王子十人  
德恭德隆德彝德雍德鈞德欽德潤德文德愿德存故  
事皇族封王者物故則本宮之長封國公其後以次受  
封於是德鈞子承簡屬最長襲封徐國公官至保康軍  
留後贈彰化軍節度安定郡王諡和懿旣而以德雍子  
承亮襲封昌國公拜感德軍節度使改封榮熙寧二年



新編卷之十一  
四  
詔宣祖太祖太宗之子皆擇其後一人爲宗世世封公  
以奉其祀三年太常禮院言非舊制合依禮令傳嫡承  
襲詔可乃以承亮爲秦國公奉秦王祀卒贈樂平郡王  
諡恭靜子克愉嗣克愉卒子叔牙嗣元符三年改今封  
德恭字復禮貴州防禦使廷美徙房陵諸子悉從行因  
免官廷美卒復以德恭德隆爲刺史雍熙元年詔德恭  
封安定郡侯判濟州德隆封長寧郡侯判沂州諸弟皆  
隨赴治所後德恭進安定郡公歷衡州防禦使被疾子  
承慶割股肉食之卒贈護國軍節度兼侍中仁宗追封  
高密郡王諡慈惠承慶至和州團練使卒贈武信軍節

度使循國公子六人克繼善楷書尤工篆隸仁宗曰本  
陽冰唐室之秀今克繼朕之陽冰也訓子弟力學一門  
登儒科者十有二人山其集廣韻字源上之至定武軍節  
度觀察留後卒贈開府儀同三司建國公諡章靖弟承  
壽至南作坊使卒贈德州刺史武當侯子四人克巳工  
書曉音律至右千牛衛大將軍卒贈深州防禦使饒陽  
侯子叔韶字君和皇祐初進所爲文召試學士院中等  
賜進士及第仁宗曰宗子好學者頗多獨爾以文章第  
進士前此未有也至和州防禦使卒贈鎮東軍留後會  
稽郡公克脩字子莊至右神武軍大將軍成州團練使



卒贈同州觀察使馮翊侯子叔充藏書至萬卷九子登  
科者三至唐州防禦使卒贈崇信軍節度使尹國公諡  
孝齊遺表新任子從之宗室正任有遺恩自此始德隆  
字日新歷官沂州守卒追封臨沂郡公加贈崇信軍節  
度同平章事子承訓至順州刺史卒贈深州團練使德  
彝字可久封長寧郡侯代兄德隆判沂州時年十九飛  
蝗入境責躬齋禱既而蝗自殪進封郡公改封廣平至  
保信軍節度觀察留後卒贈昭信軍節度使信都郡王  
諡安簡後改封賴川子承矩至莊宅使卒贈博州刺史  
承勛空供奉官卒贈六宅副使承範承拱竝西京作坊

使承衍內殿崇班承錫供奉官德雍字仲達至天平軍  
節度觀察留後咸寧郡公卒贈宣德軍節度同平章事  
諡康簡加封廣陵郡王子承睦至南康侯次卽承亮也  
德鈞字子正性和雅善書翰好爲篇什至右衛將軍加  
右監門衛大將軍卒贈河州觀察使安鄉侯子承緒供  
奉官承偉承雅承裔承鑑承則竝西京作坊使承裕禮  
賓副使承翊內殿崇班承簡襲徐國公承幹至懷州防  
禦使卒贈保靜軍節度使蕭國公子克敦嗜經術至宣  
州觀察使卒贈開府儀同三司和國公德欽字丕從至  
右羽林衛將軍卒贈雲州觀察使雲中侯子承遵西京



作坊使德潤字溫玉頗好學善爲詩至右羽林衛將軍  
卒贈應州觀察使金城侯德文字子矧少好學工爲辭  
章數言願得名士爲師友特命翰林學士楊億與之游  
累官昭武軍節度使易感德武勝二軍加同平章事慶  
曆四年宗室王者四人以德文屬祖且賢方漢東平王  
蒼進封東平郡王加兼侍中卒年七十二贈太師中書  
令申王諡恭裕子六人承顯以王後襲封康國公至昭  
化軍節度使卒贈太尉樂平郡王德原字公謹至左武  
衛大將軍卒贈深州觀察使姑臧侯德存字安世至羽  
林衛將軍卒贈洮州觀察使洮陽侯子承衍禮賓副使

凡廷美後其行自德而下曰承曰克曰叔曰之曰公曰  
彥曰夫曰時曰若曰嗣曰次云

太祖四子長德秀次德昭次德林次德芳德秀德林皆  
早亡徽宗追封德秀滕王德林舒王

燕王德昭字日新故事皇子出閣封王太祖以德昭冲  
年欲其由漸而進授貴州防禦使後授興元尹山南西  
道節度使檢校太傅同中書門下平章事太宗立改京  
兆尹移鎮永興兼侍中始封武功郡王娶王溥女封韓  
國夫人太平興國四年從征幽州軍中嘗夜驚不知上  
所在有謀立德昭者上聞不悅及歸以北征不利又不



行太原之賞德昭以爲言上大怒曰待汝自爲之賞未  
晚也德昭退而自刎上聞驚悔往抱其尸大哭曰癡兒  
何至此耶贈中書令追封魏王諡曰懿後改吳王越王  
眞宗立贈太傅乾興初加贈太師子五人惟正惟吉惟  
固惟忠惟和慶曆四年詔封十王之後以惟忠子從藹  
襲封潁國公而惟吉子守巽以冀王後最長與從藹同  
封守巽至和州防禦使卒贈武成軍節度使楚國公從  
藹至齊州防禦使卒贈武勝軍留後韓國公既而以弟  
從信襲封榮國公至雄州防禦使卒贈保寧軍節度使  
楚國公諡安僖既而以兄從恪子世規襲封崇國公至

右龍武大將軍沂州防禦使卒守巽子世清累封會稽  
郡王至保信軍留後友愛諸弟作棣萼會於邸中卒贈  
安化軍節度使開府儀同三司號王諡恭安子令廓嗣  
徽宗改封燕王先是神宗詔攷太祖之籍以屬近行尊  
者一人裂土地而王之使常從獻郊廟世世勿復絕於  
是以德芳之孫從式爲安定郡王奉太祖祀及從式卒  
乃以從藹子世準襲封安定郡王爲人內恕外嚴無綺  
羅金玉之好至保靜軍節度使卒年六十八贈開府儀  
同三司成王世開襲封世開惟和孫也學問該洽事後  
母孝撫孤姪如已子神宗召對便殿論事甚衆至奉國



軍留後卒贈開府儀同三司信王諡獻敏世雄嗣世雄亦從諡子少力學知名徽宗時以世雄於太祖之宗最爲行尊拜崇信軍節度使襲安定郡王知太宗正事卒年七十五贈太尉淄王諡恭憲以從信子世福襲封至集慶軍節度使卒贈儀王以令盪襲爵乃德芳曾孫也惟正樂安郡公特拜建寧軍節度使卒贈侍中同安郡王諡僖靖無子以弟惟忠子從謙爲嗣至左龍武大將軍温州團練使坐暴虐削爵幽之別宅自剄死贈濟州防禦使濟南侯惟吉字國祥生甫彌月太祖命育于內廷三歲作弱弓輕矢植金錢爲的俾之戲射十發八中

帝甚奇之太祖崩惟吉裁六歲晝夜哀號不食者久之太平興國八年始出居東宮後授閩州觀察使真宗卽位授武信軍節度加同平章事改感德軍節度卒年四十五贈中書令南陽郡侯諡康孝惟吉好學善屬文每誦詩至蓼莪篇涕泗交下宗室推其賢孝工草隸飛白子守節以所書直草千文獻詔褒之追贈太尉仁宗封冀王守節弟守約守巽守度守廉守康守節累遷彰化軍留後同知太宗正事卒贈鎮江軍節度使晉陽郡王諡僖穆子世永襲邢國公至鎮南軍留後卒贈昭信軍節度使南康郡王諡修孝世延至絳州防禦使卒贈武



寧軍留後彭城郡公守約至康州刺史卒贈沂州團練使子世靜至均州防禦使卒贈鎮海軍留後北海郡公世長至解州防禦使卒贈張信軍留後濟陽郡公守巽及子世清事見上守度至英州團練使卒贈廣州觀察使廬江侯六傳榮王希璪生與莒是爲理宗孫孟啓是爲度宗惟固字宗榦本名元宸授左千牛衛將軍卒惟忠字令德初名文起至昌州團練使卒累贈彰化軍節度使舒國公子八人從恪至西染院使卒贈磁州刺史東萊侯子世規事見上從藹事亦見上子世豐至太子右衛率卒贈進士及第世準世雄並安定郡王從秉從

穎從謹並禮賓使從質內殿崇班從信從謹及從信子世福事並見上惟和字子禮至右千牛衛大將軍卒累贈永清軍留後清源郡公惟和雅好學爲詩頗清麗工筆札優游典籍以禮法自居子從審從誨從審至復州防禦使卒贈寧國軍留後宣城郡公嘗坐姦除名已而復官從誨至台州團練使卒贈襄州觀察使襄陽侯子世開事見上紹興詔舉封典而燕秦二王後爭襲禮官言燕王太祖長子其後當襲議遂定令時字德麟德昭玄孫也蘇軾愛其才薦于朝宣仁太后曰宗室聰明者豈少哉顧德行何如耳竟不許軾被竄坐交通罰金已



而附內侍譚稹以進紹興初積官右朝請大夫高宗以  
其有干清議改環衛官襲封安定郡王至寧遠軍承宣  
使同知行在太宗正事卒貧無以爲殮帝命戶部賜銀  
絹贈開府儀同三司令砮襲封授華州觀察使除同知  
太宗正事令慮字深之從信之孫也累官集英殿修撰  
知南外宗正事所選宗子伯琮伯玖皆聰慧高宗喜轉  
令慮知泉州尋與祠歸及令砮卒令慮襲封至保平軍  
節度使卒年七十五贈少師後追封惠王謚襄靖子子  
游至湖北提刑加直祕閣會南外宗正司缺擇子游補  
之西南外宗官用文臣自子游始令諲字君序以父任

歷從事郎宣和二年以貢士試舍選合格授宣教郎調  
永豐丞累遷福州運判兼提點刑獄公事秦檜專政絕  
封十餘年檜死次令衿當襲封適以事被拘遂命令諲  
已而令諲以爵遜令衿乃陞令諲祕閣修撰知台州移  
知紹興府召權戶部侍郎領嚴饒二州鑄錢局令衿卒  
令諲由崇慶軍承宣使再襲封後除同知太宗正事遷  
敷文閣直學士特授左中大夫知紹興府乞祠歸卒令  
諲莅事明敏有風采在廣日嘗與副使章芟不協陷芟  
於死世以此少之令衿有傳自是至于嘉定令德令擅  
子棟子彤子濤子恭子覲伯栩伯祝伯澤相繼襲封凡



太祖後其行自德而下曰惟曰從曰世曰令曰子曰伯  
曰師曰希曰與曰孟云

榮王希瓚居山陰寧宗選子與莒入宮立爲沂靖惠王  
嗣及寧宗崩史彌遠矯詔立之語在理宗本紀時希瓚  
已卒贈太師中書令追封榮王配全氏封夫人王之父  
師雅以上三代各贈太師封國公次子與莒嘉熙初授  
武康軍節度使萬壽觀使仍奉朝請封開國子配錢氏  
封夫人淳祐初加開府儀同三司封嗣榮王理宗晚無  
子頗屬意與莒之子孟啓累加與莒至大傅判大宗正  
事度宗既卽位詔榮王族姻與萊等三十四人各轉官

有差累進與莒武康寧江軍節度使封福王主榮王祀  
事加食邑一千戶德祐元年判紹興府明年恭帝降元  
伯顏挾帝及母后宗室北去元主忽必烈封帝爲瀛國  
公封與莒爲平原郡公籍臨安所有貲產還給之與莒  
弟鄂州教授與票亦授翰林直學士次子孟桂仍襲封  
平原公云

秦王德芳初授貴州防禦使太宗立授興元尹山南西  
道節度使同平章事後又加檢校太尉卒年二十三贈  
中書令岐王諡康惠加贈太師改楚王子三人惟敘惟  
憲惟能慶曆四年詔封十王之後以惟敘子從照封安



國公至歸州團練使卒贈同州觀察使齊國公既而以  
惟能子從古襲封至延州觀察使卒贈保靜軍節度使  
同平章事楚國公諡惠恪既而以惟憲子從式襲封舒  
國公神宗時從式應詔封郡王奉太祖祀事見前篇至  
保康軍節度使卒贈同中書門下平章事封榮王諡安  
僖子世恩襲爵爲楚國公主德芳祀至楚州防禦使卒  
贈奉國軍節度使諡良僖徽宗改封秦王惟敘字懋功  
性純謹好學至左千牛衛大將軍卒加贈保靜軍留後  
高平郡公子從照事見上從溥至右侍禁內殿崇班惟  
憲字有則少頗縱肆長修謹善射好吟詠多讀道書

資州團練使卒贈安德軍節度使兼侍中英國公子從  
式事見上從演禮賓副使從戎從澁竝內殿崇班  
從貫供奉官從郁封新興侯三傳秀王子偁生伯琮是  
爲孝宗惟能字若拙至右神武將軍卒加贈集慶軍留  
後南康郡公子從古見上從善內殿承制從贊崇班  
秀王子偁居秀州宣和舍試合格調嘉興丞高宗選子  
伯琮育宮中子偁累官左朝奉大夫致仕卒時伯琮爲  
普安郡王解官持服既爲太子加贈太師中書令封秀  
王諡安僖配張氏封王夫人受禪稱皇伯伯母薨帝成  
服于苑中光宗立始卽湖州秀園立廟奉神主建祠臨



安以藏神貌如濮王故事孝宗兄伯圭字禹錫歷知台  
州明州有政績淳熙中自安德軍節度使加開府充萬  
壽觀使又封滎陽郡王至少傅光宗遷至太保封嗣秀  
王後判大宗正事超拜太師寧宗詔贊拜不名卒追封  
崇王謚憲靖伯圭謙謹不以近屬自居雖宴私隆洽執  
臣節愈恭孝宗嘗問潛龍時事對曰臣老矣不復能記  
憶再三問終不言帝笑曰何太謹也益愛重之子九人  
師夔字汝一以恩歷官興寧軍節度使檢校少保遷開  
府儀同三司卒贈少師新安郡王師揆字元輔韓元吉  
史浩咸薦之累遷淮西提刑兼提領屯田事奏以荒野

給軍士其屯田爲民世業者勿奪從之及代去吏請獻  
羨錢二十萬師揆曰後將病民矣歷陞節度使檢校太  
保開府儀同三司充萬壽觀使襲封卒贈太傅禮王謚  
恭惠師禹至開府儀同三司襲封卒贈太傅和王謚端  
肅其後師出師彌與澤與擇相繼嗣封師彌至保寧軍  
節度使判大宗正事累遷太傅與澤贈少師追封臨海  
郡王與擇爲浙閩廣察訪使端宗之立舅楊亮節居中  
秉權與擇自以國家親賢多所諫止遂犯忌嫉諸將俱  
憚之未幾元兵逼浙東命與擇出瑞安與守臣方洪共  
任備禦朝臣言與擇有劉更生之忠曹王臯之孝宜留



輔以隆國本譖者益急卒遣之瑞安受圍頗危急與樺  
洪誓以死守小校李雄夜開門納外兵與樺洪率衆巷  
戰兵敗俱死與樺弟與慮子孟備被執亦俱死他同死  
者見本紀

太宗九子長元佐次元僖次元眞宗次元份次元傑次元  
偓次元偁次元儼次元億元億早亡徽宗加封元億崇  
王

漢王元佐字惟吉初名德宗少聰警年十三從獵近郊  
兔走乘輿前太宗使射一發而中契丹使在側驚異之  
遷至檢校太尉同中書門下平章事再封楚王秦王廷

美遷涪陵也元佐獨申救之廷美死元佐遂發狂至操  
挺刃傷侍人雍熙二年重陽日內宴元佐疾新愈不與  
諸王宴歸過元佐第元佐曰若等待上宴我獨不與是  
棄我也乃發忿被酒夜縱火焚宮詔遣御史捕元佐詣  
中書劾問廢爲庶人均州安置宰相宋琪率百官三上  
表請留京師未至召還廢居南宮眞宗卽位復封楚王  
聽養疾不朝平居不接人事而事或預知帝嘗遣術士  
管歸眞爲醮禳左右未及白元佐遽曰管歸眞至矣帝  
聞之曰豈非爲物所憑乎累遷太師尚書令兼中書令  
遂拜天策上將軍興元牧賜劔履上殿詔書不名時禁



中火元佐表停奉廩助完宮闕不許加兼雍州牧仁宗  
爲皇太子兼興元牧卽位兼江陵牧卒贈河中鳳翔牧  
齊王諡恭憲後改封潞王魏王子三人允升允言允成  
神宗封王後以允言子宗說嗣封祈國公坐帷薄不修  
除名又坐坑殺女僕鎖閉宮室外宅其子仲旻官道州  
刺史後因朝叩頭泣訴願納官以贖神宗亦愍之而未  
俞其請出就馬氣塞不能言及家卒贈同州觀察使馮  
翊侯宗說竟幽死以允言子宗立嗣仁宗屢賜飛白書  
旌其文雅至武寧軍節度觀察留後卒贈昭信軍節度  
使同中書門下平章事南康郡王子仲來嗣終金州刺

史子不儻嗣徽宗改封漢王不儻卒子彥清乞襲父爵  
奉漢王祀從之允升字吉先歷安德建雄安國軍節度  
使卒贈太尉平陽郡王諡懿恭子十三人宗禮宗旦宗  
悌宗惠知名宗禮至虔州觀察使成國公卒贈安遠軍  
節度使同中書門下平章事韓國公子仲翹仲髦宗旦  
字子文七歲如成人選爲仁宗伴讀卽位獲超選神宗  
拜崇信軍節度使同中書門下平章事後封華陰郡王  
加開府階卒贈太尉滕王諡恭孝宗悌字元發輕財好  
施所親用詐取藏錙得其狀曰吾不以小故傷骨肉恩  
竟不問幼喪所生母其後聞父婢語平生輒掩泣得省



身見系經卷六十一  
貌繪奉如生至明州觀察使卒贈保寧軍節度使同中書門下平章事東陽郡王諡孝憲宗惠至武昌軍節度觀察留後江夏郡王卒贈郟王允言歷左屯衛將軍掌託疾不朝貶又坐無禮於兄再貶至左監門衛大將軍黃州刺史卒贈安遠軍節度使密國公子宗說宗立事竝見上宗育至右屯衛將軍卒贈潁州防禦使汝陰侯允成至右神武將軍濮州防禦使卒贈鎮江軍節度使兼侍中子宗顏宗訥宗鼎宗嚴宗魯宗儒宗奭皆爲環衛刺史凡太宗後其行自元而下曰允曰宗曰仲曰士曰不曰善曰汝曰崇曰必曰良曰友云

太子元僖初名德明授檢校太保同平章事封廣平郡王後進封陳王改元佑詔自今宰相班在親王上宋琪等以舊制辭不允元佐被疾以爲開封尹兼侍中復改今名進封許王加中書令娶李謙溥女爲夫人卒贈皇太子諡恭孝元僖姿貌雄毅沈靜寡言尹京五年政事無失上追念不已作思亡子詩示近臣未幾人有言元僖爲嬖妾張氏所惑張頗專恣捶婢僕至死葬父母僭制上怒驗問張縊死詔停元僖用禮以一品鹵簿葬無子仁宗時詔以允成子宗保後昭成太子爲孫宗保至代州防禦使襲封燕國公性仁恕嘗書忍字於座右以



爲戒卒贈靜難軍節度使新平郡王諡恭靜子仲鞠亦好學能詩事親居喪以孝聞宗保卒子仲恕嗣至忠州團練使卒諡純僖子士盃嗣

商王元份初名德嚴又名元俊拜檢校太保同平章事累封越王真宗加中書令歷永興鳳翔節度使改王雍拜太傅卒年三十七贈太師尚書令累封魯王諡恭靖元份寬厚言動中禮標望偉如娶李漢斌之女李悍妬慘酷元份臥病上親臨問見左右無侍者因輟宮人爲主湯劑居元份喪無戚容而有謗上之語上以元份故優容之止削國封置之別所元份子三人長允寧次允

懷改允中早卒次濮王允讓生子宗實是爲英宗允讓有傳見後允讓卒以允寧子宗諤襲虢國公熙寧三年以宗諤弟宗肅嗣封魯國公宗肅子仲先嗣封徽宗改封商王允寧字德之性至孝尤喜讀唐史通知近朝典故工虞世南楷法至武定軍節度使卒贈太尉信安郡王諡僖簡子宗諤宗敏宗孟宗肅宗諤至集慶軍節度使同中書門下平章事封豫章郡王卒贈太尉韓王諡榮恩宗諤嘗亡寶器意宗肅家人子竊之宗肅曰吾廉不足取信兄弟如此乎立償其直宗諤愧不取乃施諸僧父之器得宗肅不復言宗肅至安化軍留後卒贈鎮



海軍節度使開府儀同三司北海郡王宗敏至右千牛衛大將軍文州刺史卒贈越州觀察使會稽侯頗涉書傳緣郊恩建請封所生母范氏非舊制也

越王元傑字明哲初名德和與元份同拜官遷至檢校太尉兼中書令徐州大都督武寧泰寧軍節度使改封兗王咸平中再郊祀皆爲終獻加守太保卒年三十二元傑穎悟好學善屬詞工草隸飛白建樓貯書二萬卷及爲亭樹遊息之所贈太尉尚書令謚文惠累封陳王無子仁宗以允言子宗望爲之後宗望字子國亦工書能文至右武衛大將軍舒州防禦使卒贈安化軍節度

觀察留後高密郡公子仲郃嗣封陳國公至陳州觀察使卒謚良僖子一閻嗣父卒徒行護喪數百里路人嗟惻卒贈陳州觀察使徽宗改封陳王爲越王

鎮王元偓字希道授檢校太保左衛上將軍封徐國公既而拜洪州都督鎮南軍節度使真宗加同平章事封彭城郡王進封寧王累加檢校太尉中書令歷成德安國等軍節度改封相王又加守太傅真宗屢以學術勗宗子元偓首冠藩戚益自修勵上每製篇什必令屬和又進太尉加兼尚書令天禧元年換成德鎮寧二鎮進封徐王卒年四十二贈太師尚書令鄧王謚恭懿後累



宋史新編卷六十一  
改封治平中封韓王子允弼仁宗累遷武寧軍節度使  
兼侍中判大宗正事封北海郡王英宗時拜中書令徙  
王東平神宗拜太保鳳翔雄武軍節度使母憂辭起復  
卒贈太師尚書令兼中書令相王諡孝定子宗績襲祖  
恭懿王封爲韓國公卒贈南康郡王諡良孝宗績弟宗  
景事母孝居第火冒急赴家廟不恤其他火亦不爲害  
元祐中累遷彰德軍節度開府儀同三司檢校司空封  
濟陰郡王將以妾繼室坐奪開府旣而還之卒贈太師  
循王諡曰思宗績旣卒子仲磨嗣歷西川劔南節度使  
徽宗改封鎮王

楚王元偁字令聞少與元偓同拜官後領鄂州都督武  
昌軍節度使真宗加同平章事封安定郡王進舒王累  
加檢校太尉中書令歷鎮南寧國軍節度使拜太保卒  
年三十四贈太尉尚書令曹王諡恭惠後再改蔡王有  
集三卷筆札一卷子允則至右千牛衛大將軍無子以  
平陽懿恭王之子宗達爲後襲封蔡國公鄰家失火盜  
因爲奸竊所服帶旣而得之且知其主名貸不問浚井  
得鎗復投之至武信軍留後卒贈安化軍節度使開府  
儀同三司高密郡王子仲約嗣徽宗改封楚王  
周王元儼少奇穎真宗卽位始授官進封榮王累加檢



校太尉兼中書令坐侍婢縱火延燔禁中奪節降封端  
王尋加鎮海安化軍節度使封彭王進太保仁宗累拜  
太師歷河陽三城武成節度封孟王改永興鳳翔京兆  
尹封荆王遷雍州鳳翔牧景祐二年大封拜宗室授荆  
南淮王節度大使行荊州揚州牧仍賜入朝不趨元儼  
廣穎豐頤嚴毅不可犯天下崇憚之名聞外夷事母王  
德妃孝母喪哀戚過人平生寡嗜慾惟喜聚書好爲文  
詞頗善二王書工飛白仁宗冲年卽位章獻太后臨朝  
自以屬尊望重恐爲太后所忌深自沉晦因闔門卻絕  
人事故謬語陽狂不復預朝謁及仁宗親政益加尊寵

病甚親至臥內手調藥所對多忠言賜白金五千兩固  
辭不受曰臣羸憊且死將重費家國矣卒贈天策上將  
軍徐兗二州牧燕王謚恭肅子十三人允熙允良允迪  
允初餘皆早卒允良子宗絳嗣封吳國公徽宗改封周  
王允熙至右監門衛將軍滁州刺史卒贈博州防禦使  
博平侯允良歷節鎮封郡王由同平章事兼侍中至太  
保中書令好酣寢以日爲夜卒贈定王有司以其反易  
晦明謚榮易允迪累官耀州觀察使居父喪不哀又嘗  
宮中爲優戲爲妻錢氏所告制降右監門衛大將軍錢  
氏亦度爲洞真道士允初雖風雨不廢朝會惟誦佛書



未嘗問財物厚薄至寧國軍節度使同中書門下平章  
事卒贈中書令博平郡王無子以允成孫仲連爲後  
真宗六子長禛次祐次祗次祉次祈次仁宗禛祗祉祈  
皆早亡徽宗追封禛溫王祗昌王祉信王祈欽王  
太子祐封信國公生九年而薨追封周王諡悼獻仁宗  
贈太尉中書令追冊皇太子

仁宗三子昉昕曦皆早亡徽宗改封昉揚王昕雍王曦  
荆王

濮王允讓字益之天資渾厚喜愠不形仁宗累擢寧江  
軍節度使封汝南郡王拜同平章事判大宗正司卒年

六十五贈太尉中書令追封濮王諡安懿王十三子  
實仁宗育于宮中久之立爲皇子仁宗崩嗣立是爲英  
宗治平元年宰相韓琦等奏請下有司議濮安懿王及  
譙國夫人王氏襄國夫人韓氏仙遊縣君任氏合行典  
禮詔須大祥後議之二年翰林學士王珪等奏曰謹按  
儀禮喪服爲人後者傳曰何以三年也受重者必以尊  
服服之爲所後者之祖父母妻妻之父母昆弟昆弟之  
子若子謂皆如親子也又爲人後者爲其父母傳曰何  
以期不二斬特重於大宗降其小宗也爲人後者爲其  
昆弟傳曰何以大功爲人後者降其昆弟也先王制禮



尊無二上若恭愛之心分於彼則不得專於此故也是以秦漢以來帝王有自旁支入承大統者或推尊其父母以爲帝后皆見非當時取議後世臣等不敢引以爲聖朝法况前代入繼者多宮車晏駕之後援立之策或出臣下非如仁宗皇帝年齡未衰簡推聖明陛下親爲先帝之子然後繼體承祧光有天下濮安懿王雖於陛下有天性之親顧復之恩然陛下所以負宸端冕富有四海子子孫孫萬世相承皆先帝德也臣等竊以爲濮王宜準先朝封贈期親尊屬故事尊以高官大國譙國襄國仙遊竝封大夫人於是中書奏王珪等所議未見

詳定濮王當稱何親名與不名珪等議濮王於仁宗爲兄於皇帝宜稱皇伯而不名中書又奏禮與令及五服年月敕出繼之子於所繼所生皆稱父母又漢宣帝光武皆稱父爲皇考今珪等議未有明據請下尚書省集三省御史臺議奏已而皇太后手詔詰責執政於是詔曰如聞集議不一權宜罷議令有司博求典故以聞禮官范鎮等又奏漢之稱皇考稱帝稱皇立寢廟序昭穆皆非陛下聖明之所法宜如前議爲便御史呂誨等彈奏歐陽脩首建邪議韓琦曾公亮趙槩附會不正之罪固請如王珪等議既而內出皇太后手詔謂追崇之典



前史自有故事濮王及夫人王氏韓氏任氏皇帝稱親  
濮王稱皇王氏以下竝稱后事方施行而英宗卽日手  
詔辭稱后祇稱親且欲以塋爲園卽園立廟俾王子孫  
主奉祠事翌日誨等以所論列彈奏不見聽用繳納御  
史敕告家居待罪誨等所列大抵以爲前詔稱權罷集  
議後詔又稱且欲以塋爲園卽追崇之意未已誨等既  
出而濮議亦寢至神宗詔以濮安懿王三夫人可竝稱  
王夫人云王二十八子長宗懿宿州團練使封和國公  
卒封舒王子仲鸞常州防禦使父卒諸子皆進官仲鸞  
獨不忍受性喜翰墨樂施與九族稱賢卒贈武康軍節

度使洋國公益曰良弟仲汾喜書史父喪毀瘠卒歷官  
萊州防禦使贈昭化軍節度使次宗樸治平中建濮王  
園廟拜宗樸彰德軍節度使封濮國公奉王後神宗加  
秩封濮陽郡王卒贈太師中書令定王諡僖穆子仲佺  
父歿不食者數日母葬時天大雪步泥中扶翼至潤州  
觀察使卒贈開府儀同三司宗樸既卒宗誼襲封卒贈  
太師中書令廣陵郡王諡莊孝宗暉初襲濮國公既而  
神宗議封安懿王子爲嗣濮王世世不絕於是宗暉進  
嗣濮王歷鎮南軍節度使檢校司徒卒贈太師懷王諡  
榮穆子仲璩父喪哀痛不能勝纔服除卒歷官右監門



宋史新編卷六十一  
衛大將軍合州刺史宗晟以武安軍節度使判大宗正  
事加檢校司徒嗣濮王卒年六十五贈太師昌王諡端  
孝宗晟好古學藏書數萬卷英宗數被疾宗晟密請早  
建儲以係天下之望世稱其忠既卒宗愈以鎮安軍節  
度使開府儀同三司檢校司徒嗣封卒贈太師襄王諡  
恭憲宗綽嗣至河陽三城節度使檢校司徒卒贈太師  
榮王諡孝靖宗楚至檢校司徒武昌軍節度使嗣濮王  
卒贈太師惠王諡僖節宗祐克已自約蕭然若寒士好  
讀書尤喜學易從父允初無子詔以宗祐爲後泣曰臣  
不幸幼失怙恃將終身悲慕忍爲人後乎敢以死請仁

宗憐而從之至清海軍節度使開府儀同三司封乘城  
郡王加檢校司徒嗣濮王卒贈太師欽王諡穆恪宗漢  
英宗幼弟也嗣濮王歷諸鎮節度使開府儀同三司判  
大宗正事加檢校司徒太保太尉卒贈太師景王諡孝  
簡仲增嗣至彰德軍節度使開府儀同三司卒贈少師  
簡王諡穆孝仲御自幼不群通經史多識朝廷典故至  
檢校少傅泰寧軍節度使開府儀同三司嗣封卒贈太  
傅郇王諡康孝仲爰嗣拜建武軍節度使爲大宗正加  
開府階封江夏郡王徙節泰寧定武檢校少保少傅卒  
贈太保恭王仲理嗣爲安國軍節度使加檢校少保開



府階靖康之難仲理同二帝北遷高宗南渡奉濮王神  
 主于紹興光孝寺有仲湜者字巨源初名仲沮楚榮王  
 宗輔之子安懿王孫也高宗即位于南京仲湜由漢上  
 率眾徑謁乃詔仲湜封嗣濮王加開府階歷檢校少傅  
 卒追封儀王謚恭孝仲湜事母以孝聞喜親圖史子士  
 從士街士錢士衍士歆士從歷涇洪二州觀察使權知  
 濮王園令士街同知大宗正事安慶軍承宣使主奉濮  
 王祠事初以軍興南班宗子權罷歲賜至有身歿不能  
 殮者士街言于朝詔復舊制拜安德軍節度使典宗司  
 凡十四年士錢至安慶軍節度使同知大宗正事隆興

初乞減奉賜之半助軍費由是宗室多效之者士街至  
 崇慶軍節度使知西外宗正事仲儻宗漢子也加檢校  
 少保向德軍節度使襲封嗣濮王仲儻不慧以次得封  
 卒追封瓊王謚恭惠秦檜專政罷襲檜死始以崇慶軍  
 節度使士儻襲封卒贈少師思王謚溫靖弟士輅襲封  
 授昭化軍節度使加開府階除知大宗正事累加三少  
 卒贈太傅安王上歆襲封加開府階累陞三少卒贈太  
 傅歆王不秭安懿王玄孫也年七十六以齒長襲封轉  
 武安軍承宣使卒贈開府階蔣國公不壘襲封遷寧遠  
 軍承宣使卒贈開府階安國公不儔襲封除昭慶軍節



宋史新編卷六十一  
度使遷檢校少保卒贈少師高平郡王其後不嫔授福  
州觀察使不凌終奉國軍承宣使不熄授保康軍承宣  
使善珊授保康軍節度使善奐授福州觀察使寶祐中  
曰善騰景定中曰善諮俱相繼襲封云

宋史新編卷六十一

宋史新編卷六十一

列傳四

明南京戶部主事莆田柯維騏編

宗室

吳王顥

益王顥

吳王似

燕王倬

楚王似

太子茂

鄆王楷

肅王樞

景王杞

濟王栩

徐王棣

沂王樛

和王棡

信王榛

太子諶弟訓

太子勇

信王璩

太子楷

魏王愷

太子詢

鎮王竑



英宗四子長神宗次顥次顏次顏顏早亡徽宗追封顏  
潤王

吳王顥字仲明初名仲紕累官檢校太傅保寧軍節度  
使同平章事封東陽郡王神宗進封昌王官制行拜司  
空徙王雍哲宗徙封揚遷至太傅歷京兆鳳翔數鎮自  
熙寧以來顥屢請居外不許元祐初乃賜咸宜坊第一  
區榜曰親賢拜太尉官其諸子制曰先皇帝篤兄弟之  
好以恩勝義不許二叔出居于外蓋武王待周公之意  
太皇太后嚴朝廷之禮以義制恩始從其請出就外宅  
得孔子遠其子之意二聖不同同歸于道皆可以爲萬

世法晉漢明帝問東平何以爲樂王言爲善最樂帝大  
其言因送列侯印十九枚諸子五歲以上悉佩之天下  
不以爲私今王諸子性于忠孝漸于禮義自勝衣以上  
頽然皆有成人之風朕甚嘉之其各進一官以助其爲  
善之樂尚勉之哉母忝父祖以爲邦家光徙封徐詔書  
不名後拜太師改淮南荆南節度使累封楚王卒年四  
十七贈尚書令兼中書令揚荆冀三州牧燕王諡曰榮  
徽宗改封吳王顥天資穎異嗜學知禮子孝騫嗣終寧  
國軍節度使晉康郡王孝錫嘉州團練使贈永國公凡  
神宗諸弟之後其行自孝而下曰安曰居曰多曰自曰







牙史新編卷之三十一  
青城父老邀之不及道遇二王哭曰願與王俱死徐秉  
哲捕爲首者戮之益兵衛送二王于金營北行道卒紹  
興初有崔紹祖者至壽春府稱越王次子受上皇蠟詔  
爲天下兵馬大元帥興師恢復事敗斬越州市  
楚王似初爲集慶軍節度使進封郡王元符初封簡王  
似於哲宗爲母弟哲宗崩皇太后議所立宰相章惇以  
似對后曰均是神宗子乃立端王是爲徽宗加司徒徙  
封蔡拜太保更歷數鎮以王府史語言指斥送大理寺  
驗治似上表待罪左司諫江公望上疏以爲親隙不可  
開疑迹不可顯一有浸淫旁及蔡王之語不識陛下將

何以處之陛下何顏見神考於太廟乎疏入公望罷  
淮陽軍徽宗頗思其言止治其左右崇寧中徙鎮荆南  
武寧卒贈太師尚書令兼中書令冀州牧韓王改封楚  
王謚榮憲子有恭定國軍節度使永寧郡王

哲宗太子茂劉皇后爲賢妃時所生三月而夭追封越  
王謚冲獻徽宗追册爲皇太子改謚獻愍后之立也右  
正言鄒浩三上疏諫隨削其橐至是或謂浩疏有殺卓  
氏而奪其子欺人可也詎可以欺天乎之語徽宗乃峻  
茂典册復竄浩遠州后上表謝然浩蓋無是言也

徽宗三十一子長欽宗次檉次楷次楫次樞次杞次栩



次棫次高宗次材次模次植次朴次棣次栲次栝次栳次  
次榛次椿次握次捷次機次挺次樾次檍次椅次棟次  
榑次桐次柄次縱七早亡榿楫材朴拱椿追加王封機  
始生爲陳國公云

鄆王楷初名煥累封嘉王歷十一節度使重和元年廷  
策進士唱名第一徽宗不欲楷先多士更以王昂爲榜  
首楷超拜太傅改王鄆欽宗立改鎮鳳翔彰德軍靖康  
初與諸王皆北遷

肅王樞自吳國公累今封歷六節度使靖康之難金人  
要親王爲質且求輸兩河於是樞爲所留挾以北去

景王杞濟王栩並歷節鎮開府進今封至太傅靖康之  
難杞從欽宗幸青城及上皇出郊杞日侍左右衣不解  
帶食不御肉上皇製發願文述祈天請命之意授杞杞  
頓首泣及北行鬚髮盡白當時金帥索諸王家屬栩夫  
人曹氏避難他出徐秉哲捕而拘之遂俱北

徐王棣沂王栲和王棻信王榛所歷官封槩與諸兄同  
靖康之難與兄益王棫祁王模莘王植及其幼弟安康  
郡王榘廣平郡王楗相國公挺瀛國公樾建安郡王楫  
嘉國公椅溫國公棟英國公榑儀國公桐昌國公柄潤  
國公縱俱北遷栲至北方與駙馬劉彥文告上皇左右



謀變金遣人按問上皇遣莘王及駙馬蔡條等對辨凡三日樛彥文氣折金人誅之榛行至慶源亡匿真定境中時馬廣與趙邦傑聚兵保五馬山砦陰迎榛奉以爲主兩河遺民響應榛遣廣奏乞委以總兵與諸砦約日大舉黃潛善汪伯彥疑非真高宗識榛手書遂除河外兵馬都元帥潛善伯彥終疑之廣知事不成留大名不進會有言榛將渡河入京朝廷因詔擇日還京以伐其謀金人恐廣以援兵至急發兵攻諸砦斷其汲道砦陷榛亡不知所在或曰後同上皇居五國城紹興元年鄧州有楊其姓者聚衆稱信王鎮撫使翟興覺詐遣將斬

之二年萬州有李勃亦自稱徐王驗其詐棄市

欽宗太子諶政和七年生爲嫡皇孫祖宗以來所未有靖康元年詔立爲皇太子明年同二帝北遷初金帥之索太子也統制吳革謀匿民間遲疑不決者五日吳并莫儔督脅甚急范瓊恐變生以危言龍霽士遂擁太子與皇后共車以出百官軍吏奔隨號哭太學諸生擁拜車前太子呼云百姓救我哭聲震天有弟訓北地所生紹興中碭山人留遇僧自言少帝第二子驗其詐黥竄之有自此至者曰淵聖小大王訓見居五國城高宗太子塹生三歲苗傅劉正彥作亂逼帝禪位于塹



改元明受帝復位乃以勇爲皇太子數月薨諡元懿  
信王璩字潤夫初名伯玖藝祖七世孫秉義郎子彥之  
子生而聰慧與伯琮同育宮中賜名璩時生七歲矣紹  
興十五年加檢校少保進封恩平郡王出就外第時伯  
琮已封普安郡王璩官屬禮制相等夷號東西府普安  
郡王始立爲皇太子璩因加恩稱皇姪名位始定孝宗  
卽位授少保改靜江軍節度使改判西外宗正司璩累  
章乞開改醴泉觀使淳熙中除少傅卒追封信王累贈  
太師子四人師淳歷永州防禦使師灝師滄師路竝補  
武大夫孫希楸特補保義郎

孝宗四子長恪次愔次愷次光宗恪生於王邸早亡後  
追封邵王諡悼肅

太子愔初名愉故事皇子出閣封王兼兩鎮然後加司  
空孝宗受禪愔自蘄州防禦使拜少保永興軍節度使  
進封鄧王異數也乾道初立爲皇太子用錢氏爲妃薨  
年二十四諡莊文服制見禮志子挺早亡寧宗命宗子  
希璘爲後更名思正累少師廬陵郡王卒諡簡惠

魏王愷初封慶王莊文薨孝宗立恭王爲太子加愷雄  
武保寧軍節度使進封魏王判寧國府夫人韋氏進封  
韓魏兩國夫人以示優禮愷究心民事築圩田之隳圯



者帝手詔嘉勞後判明州輟屢邑田租以贍學得兩岐  
麥圖以獻改永興成德軍節度使揚州牧卒年三十五  
贈淮南武寧軍節度使兼徐州牧諡惠憲初帝聞王訃  
泣然曰向越次建儲正爲此子福氣差薄耳子二摠早  
亡柄封吳興郡王領昭慶軍節度使卒贈太保沂王諡  
靖惠子垓早亡寧宗立貴和爲後已而立貴謙以少師  
保康軍節度使加開府贈太傅封申王

寧宗八子垓坦增珂圻塢垵坻皆數月亡各加王封諡  
以冲冠

太子詢燕懿王後初名與愿六歲寧宗養宮中賜名曦

除福州觀察使進威武軍節度使封衛國公韓偓曾開  
邊職用翊善史彌遠計奏罷之曦立爲皇太子加開府  
封榮王更名壽又更詢薨年二十九諡景獻理宗立乃  
裕爲後累少保保寧軍節度使贈少傅封臨川郡王  
鎮王竑宗室希翼子也初爲沂王後賜名均改貴和寧  
宗皇子詢薨迺立貴和爲皇子賜今名授寧武軍節度  
使封祁國公後加檢校少保封濟國公竑生子賜名銓  
授左千牛衛大將軍銓卒贈復州防禦使追封永寧侯  
竑好鼓琴丞相史彌遠買美人善琴者納諸御而厚廩  
其家使矚竑動息必以告竑嬖之宮壁有輿地圖竑指



瓊厓曰吾他日得志置史彌遠於此又嘗呼彌遠爲新恩以他日非新州則恩州也彌遠聞之嘗因七月七日進乞巧奇玩以覘之竝乘酒碎於地彌遠大懼日夕思以處竝而竝不知也時沂王猶未有後方選宗室希璠子昀繼之一日彌遠爲其父飯僧淨慈寺獨與國子學錄鄭清之登惠日閣屏人語曰皇子不堪負荷聞後沂邸者甚賢今欲擇講官君其善訓迪之事成彌遠之坐卽君坐也然言出於彌遠之口入於君之耳若一語洩者吾與君皆族矣乃以清之兼魏惠憲王府教授清之日教昀爲文又購高宗書俾習焉清之上謁彌遠卽以

昀詩文翰墨以示彌遠譽之不容口彌遠嘗問清之吾聞其賢已熟大要竟何如清之曰其人之賢更僕不能數然一言以斷之曰不凡彌遠領之再三寧宗崩彌遠始遣清之往告昀以將立之之意再三言之昀默然不應徐答曰紹興老母在清之以告彌遠益相與歎其不凡竝跂足以需宣召久而不至彌遠在禁中遣快行宣皇子令之曰今所宣是沂靖惠王府皇子非萬歲巷皇子苟誤則汝曹皆處斬竝屬目墻壁間見快行過其府而不入疑焉已而擁一人徑過天已暝不知其爲誰甚感昀旣至彌遠引入樞前舉哀畢然後召竝竝聞命亟



文獻通考卷之十二  
九  
赴至則每過宮門禁衛拒其從者彌遠亦引入柩前舉  
哀畢引出帷殿帥夏震守之既而召百官立班聽遺制  
則引竑仍就舊班竑愕然曰今日之事我豈當仍在此  
班震給之曰未宣制以前當在此宣制後乃卽位耳竑  
以爲然未幾遙見燭影中一人已在御坐宣制畢閣門  
贊呼百官拜舞賀新皇帝卽位竑不肯拜震捧其首下  
拜昀立是爲理宗皇后矯遺詔竑開府儀同三司進封  
濟陽郡王判寧國府帝因加竑少保進封濟王充醴泉  
觀使令就賜第寶慶元年正月湖州盜潘壬潘丙潘甫  
謀立竑竑聞變匿水竇中盜擁至州治以黃袍加其身

竑泣不從不獲已與之約曰汝能勿傷太后官家乎衆  
許諾守臣率官屬入賀是時壬等僞揭李金榜數彌遠  
廢立罪云今領精兵二十萬水陸竑進比明視之皆太  
湖漁人及巡尉兵卒不滿百人耳竑知謀不成率州兵  
誅賊遣王元春告于朝彌遠奏遣將討之至則事平彌  
遠令客秦天錫託召醫治竑疾諭旨逼竑縊州治計聞  
帝輟朝贈少師保靜鎮潼軍節度使給事中盛章權直  
舍人院王堅一再繳奏右正言李知孝累奏追奪王爵  
降封巴陵縣公於是直德秀魏了翁洪咨夔胡夢昱等  
每以竑爲言彌遠輒惡而斥之端平初詔復官爵妻吳



氏自請爲比丘尼賜惠淨法空大師月給鉢錢百貫度  
宗降詔追復元贈節度使德祐初常楙請立竝後又以  
王應麟奏下禮官議贈太師尚書令依舊節度使封鎮  
王諡昭肅賜其家田萬畝遣應麟致祭焉  
理宗三子緝繹維皆早亡各加王封諡以冲冠  
度宗六子長焯次憲次鐸次端宗次帝熈次帝昺焯生  
於東宮授容州觀察使封資國公憲次檢校太尉武安  
軍節度使封益國公與鐸俱早亡



